

**AWIG – AWIG
DESA PAKRAMAN PENGLUMBARAN
KANGIN**




**KAMEDALANG OLIII :
KRAMA DESA PAKRAMAN PENGLUMBARAN KANGIN**




**DESA TIGA KECAMATAN SUBUT
KABUPATEN BANGLI
WARSA 2008**

**AWIG – AWIG
DESA PAKRAMAN PENGLUMBARAN
KANGIN**



**KAMEDALANG OLIH :
KRAMA DESA PAKRAMAN PENGLUMBARAN KANGIN**



**DESA TIGA KECAMATAN SUSUT
KABUPATEN BANGLI
WARSA 2008**

**PIDAGING
BANTANG AWIG-AWIG
DESA PAKRAMAN PENGLUMBARAN KANGIN**

	Hal
MURDHA CITTA	1.
PRATAMA SARGAH : Aran Lan Pawidangan Desa	2.
DWITYA SARGAH : Patitis Lan Pamikukuh	2.
TRITYA SARGAH : Sukerta Tata Pakraman	2.
Palet 1. Indik Krama	2.
Palet 2. Indik Prajuru Lan Dulun Desa	5.
Palet 3. Indik Kulkul	6.
Palet 4. Indik Paruman	6.
Palet 5. Indik Druwen Desa	7.
Palet 6. Indik Penyanggran Banjar	8.
CATURTAS SARGAH : Sukerta Tata Agama	9.
Palet 1. Indik Dewa Yadnya	9.
Palet 2. Indik Rsi Yadnya	11.
Palet 3. Indik Pitra Yadnya	12.
Palet 4. Indik Manusa Yadnya	15.
Palet 5. Indik Bhuta Yadnya	15.
PANCAMA SARGAH : Sukerta Pawongan	16.
Palet 1. Indik Pawiwahan	16.
Palet 2. Indik Nyapian (Balu)	17.
Palet 3. Indik Sentana	19.
Palet 4. Indik Warisan	20.
SAD SARGAH : Sukerta Tata Palemahan	21.
Palet 1. Indik Bhaya	21.
Palet 2. Indik Karang Lan Tegal	22.
Palet 3. Indik Pepayonan	23.
Palet 4. Indik Wewalungan	23.
Palet 5. Indik Wewangunan	23.
SAPTAMA SARGAH : Wicara Lan Pamidanda	24.
Palet 1. Indik Wicara	24.
Palet 2. Indik Pamidanda	24.
ASTAMAS SARGAH : Nguwah Nguwuhin Awig-Awig	25.
NAVAMAS SARGAH : Samapta	26.

MURDHA CITTA

Om Awighnamastu nama siddham,

Malarapan saking asung kerta lugraha, Ida Sang Hyang Widhi Wasa ngawentenang kahuripan sekala niskala, ring Bhuwana Agung lan Bhuwana Alit. Manut dresta Desane wanatah pawakan pasayuban Krama Desa rawuhing kula warga pawongannia. Desane keanggehang Bhuwana Agung, pawongannia soang-soang pinaka Bhuwana Alit.

Sotaning Bhuwana Agung, Desane wantah pawakan Bhuwana maurip jangkep saha Tri Hita Karannya luwire :

- ha. Parhyangan, sehananing kahyangan, penyiwian desa genah ngarcana Ida Hyang Parama Wisesa pinaka atma desane;
- na. Pawongan, krama saha warga desa maka sami, maka pawakan Tri Kaya mawaning desane sida molah maprawerti;
- ca. Palemahan, tanah kakuwuban desa sinanggeh stula sariraning desane.

Adung patemoning bhuwana kalih, malarapan cantu Jagadhita sinanggeh murdhaning prayojana pang riptaning awig-awig Desa Pakraman ring paseban mami krama desa adat.

Pinaka putusing paseban, wastu prasida prayojanan mami kabeh prasama angidep muwah amanggehaken kadi ling ing awig-awig iki.

**PRATAMA SARGAH
ARAN LAN PAWIDANGAN DESA
Pawos 1**

- (1) Desa Pakraman puniki mawasta Desa Pakraman Penglumbaran Kangin
- (2) Jebar kakuwub wawidangannya mawates nyatur :
 - ha. Sisih Wetan Desa Pakraman Buungan
 - na. Sisih Kulon Desa Pakraman Penglumbaran Kawan;
 - ca. Sisih Lor Desa Pakraman Tiga;
 - ra. Sisih Kidul Desa Pakraman Alisbintang.
- (3) Desa puniki kawangun antuk karang desa utawi gebogan krama, turmaning nunggil dados abanjar.

**DWITYA SARGAH
PATITIS LAN PAMIKUKUH
Pawos 2**

Desa Pakraman Penglumbaran Kangin ngemanggehang pamikukuh minakadi :
ha. Pancasila;
na. Undang-Undang Dasar 1945;
ca. Tri Hita Karana manut sada cara Agama Hindu.

Pawos 3

Luwir patitis Desa Pakraman Penglumbaran Kangin
ha. Mikukuhin miwah ngerajegang Sang Hyang Agama;
na. Nginggilang tata prawertine maagama;
ca. Ngerajegang kasukerta desa saha Pawongannia sekala lan niskala;
ra. Ngakukuhin awig-awig, pararem lan paswara;
ra. Nyungkemin Gebog Satak Tiga Buungan.

**TRITYA SARGAH
SUKERTA TATA PAKRAMAN
Palet 1
Indik Krama
Pawos 4**

- (1) Sane kabawos krama desa inggih punika kulawarga sane maagama Hindu saha ngemong karang desa utawi jumenek ring wawidangan Desa Pakraman Penglumbaran Kangin;
- (2) Sajaba punika sinanggeh tamiyu, sane kabinayang dados kalih punika sane maagama Hindu miwah sane siosan Hindu.

Pawos 5

Krama Desa Pakraman wenten 4 (petang) pawos :

- (1) Krama ngarep, kulawarga sane malarapan wed utawi pangrawuh saking warga desa sewosan saha ajeg pawiwahania, sane ngamong karang lan tegal ayah desa.
- (2) Krama ayah tapukan, krama kadi ring ajeng sane durung antes ngayah, saha polih galah salami awarsa
- (3) Krama tan Ngarep, luwire :
 - ha. Krama Roban, inggih punika krama sane tanpa karang lan tegal ayah desa sakewanten sampun mawiwaha saha kantun ajeg pawiwahannia;
 - na. Krama penyada, inggih punika krama sane sampun megat ayah kagentos antuk ahli warisnia;
 - ca. Sekaa Truna-Truni, inggih punika krama sane ngawit mayusa 13 (telulas) warsa ngantos 40 (petang dasa) warsa saha dereng mawiwaha.
- (4) Krama Balu, kulawarga ngarep utawi tan ngarep sinalih tunggil raka utawi istrine lina wiadin nyapian :
 - ha. Balu mekrambian, inggih punika balu sane maduwe sentana dereng marabian;

Pawos 6

- (1) Ngawit dados Krama Desa :
 - ha. Sangkaning ngamong karang, tegal ayah desa lan siosan manut pararem;
 - na. Mawiwit pawiwahan;
 - ca. Sangkaning pinunas ngaraga utawi sangkaning jenek mapaumahan ring wawidangan Desa Pakraman Penglumbaran Kangin saha kacumponin olih krama miwah prajuru.
- (2) Panemaya tedun makrama desa ngantos 42 (abulan pitung dina) rahina mawiwit pawiwahan.
- (3) Risampun panemaya inucap kadi ring ajeng, prajuru patut ngawantunin saha mastikayang paetang parumane sane sampun langkung nganinin pidabdab ring pakraman.

Pawos 7

Tategenan miwah swadarma Krama Desa Pakraman

- (1) Tategenan krama, luwire :
 - ha. Krama Ngarep, keni urunan miwah ayahan mamungkul;
 - na. Krama Roban, keni urunan miwah ayahan ring Dalem tur urunan siosan maut pararem;
 - ca. Krama Balu, keni ayah manut manut kawongania ;
 - ra. Krama Deha Truna keni ayahan manut pinunas krama desa
 - ka. Prade rikalaning ngayah wenten sinalih tunggil krama nikel
- (2) Soang-soang krama desa sane ngerobang kulawarga sajeroning mayusa 7 (pitung) warsa ngantos 12 (roras) warsa patut ngamolihang kaweruhan saha karanjingang ring sekolah 9 (siya) warsa ngantos puput utawi ngamolihang cihna, antuk krama sane ngerobang inucap prade mamurug wenang kadanda

manut pararem saha patut ngamarginin pidabdab sakeng Guru Wisesa sajeroningnincapang kaweruhan.

(3) Krama Desa Pakraman kadadosang

ha. Mapuangkid utawi tan tedun luwire :

1. Ritatkala mapawangun/nasarin, ngaraabin sanggah, piasan. bale daja, bale dangin, bale dauh, kelumpu miwah paon;
2. Ritatkala mayadnya, ngotonin sane kapertama, nyakapang, masangih, mapasaksi, kicalan putra, sakit lan patirtan;
3. Maluasan utawi ngluang, masengker 3 (tigang) rahina selangkungnyane patut wenten kabebasan prajuru, lan sios-sios manut pararem;
4. Matepetin lan siosan, matepetin selami asasih;
5. Mapuangkid sakit salami 3 (tigang) rahina, nenten dados medal, yening sampun arahina kenak (seger) mangda masadok ring prajuru.

na. Nyada, mapiteges wusan ngayah, risampun mayusa 60 (enem dasa) warsa utawi putra sane pinih alit sampun mawiwaha, sajawaning wenten parindik sios manut pararem;

ca. Sang sane nyada kangkat kasarad, manut abot dangan pakaryan krama desa

ra. Luput patedunan kengin sangkaning dados Sadaka, Pemangku Desa, Pemangku Kahyangan Tiga, sane ceda angga banget, tur tan madrebe roban sane patut nedunin, anak alit ubuh ngantos munggah deha truna lan sane siosan manut pararem;

ka. Nekel, nutug ayah antuk berana manut paetangan desa sangkaning kajudi antuk sang mawang rat utawi jenek ring dura desa ngerereh pakaryan;

da. Panyeledihi nyada wiadin nyuksukin ayah risampun mayusa 17 (pitulas) warsa.

Pawos 8

Kapatutan krama tamiyu:

ha. Krama tamiyu patut digelis masadok ring prajuru sanistane arahina;

na. Krama tamiyu patut polih pitulung ring sajeroning katiben panca bhaya

Pawos 9

(1) Wusan dados Krama Desa, luwire :

ha. Sangkaning pinunas ngaraga, menawi kesah kedura desa utawi ngelangkungin segara;

na. Kanorayang, duaning sampun tan prasida ngesehin solah maprawerti setata mamurug kecaping awig-awig;

ca. Sangkaning ceput.

(2) Sang wusan makrama :

ha. Patut ngaturang ayahan ke desa;

na. Tan polih pah-pahan sangkaning padruwen desa sajawaning pah-pahan padruwen ring banjar manut pararem;

ca. Tan polih pasayuban sajeroning ala ayu;

ra. Prade sangkaning rahayu, polih lekita bukti patilar saking prajuru

Palet 2
Indik Prajuru Lan Dulun Desa
Pawos 10

- (1) Desa Pakraman Penglumbaran Kangin Kaenter antuk Bendesa utawi Kelian
Desa Pakraman
- (2) Banjar kaenter antuk Kelian Banjar;
- (3) Bendesa lan Kelian Banjar patut :
ha. Mawiwit saking krama ngarep;
na. Kaadegang malarapan antuk pemilihan olih paruman soang-soang nyabran 5
(limang) warsa sajawaning wenten parindikan tios tur dados kapilih malih;
ca. Maduluran Dewa Saksi ring Pura Desa

Pawos 11

- (1) Bendesa utawi Kelian Desa Pakraman kasanggra antuk :
ha. Patajuh utawi pangliman pinaka wakilnia;
na. Penyarikan pinaka juru surat;
ca. Patengen pinaka pangemong druwen Desa;
ra. Kelian Banjar, Kelian Gong, lan Kelian Sekaa Truna sane akehnyane manut
pararem;
ra. Kasinoman pinaka juru arah akehnia manut kawigunan saha magilir nyabran
sasih
- (2) Sajeroning ngenterang sukertan niskala, Bendesa mingsinggihang Pamangu
Kahyangan Desa;
- (3) Prajuru ngadegang Panglingsir utawi Dulu utawi Pamucuk sinanggeh kerta desa,
sane mawiwit Pajuru lepas, sang wikan ring adat agama; adiri sinanggeh panua
kasarengin juru surat sakeng Panyarikan Desa.

Pawos 12

- (1) Swadharmaning Bendesa, luwire :
ha. Ngenterang pelaksana sadaging awig-awig miwah pararem desa;
na. Nuntun tur ngenterang krama rawuhing warga desa ngupadi kasukertan
antuk patitis;
ca. Mawosin kalih niwakang pamutus marep ring wicara warga desa;
ra. Maka duta matemuang bawos ring sapa sira ugi.
- (2) Prade Prajuru utawi Dulu iwang panglaksana keni pamidanda manut pararem.

Pawos 13

- Patias utawi olih-olihan Prajuru utawi Dulu Desa, luwire :
- ha. Luput rerampen;
na. Polih tanding tengah;
ca. Petias sewosan manut pararem.

Pawos 14

- (1) Prajuru utawi Dulu Desa kagentosin riantukan :
ha. Seda;
na. Tutug Panemaya;
ca. Wit saking pakayunan utawi pinunas ngaraga manut pararem;
ra. Kanorayang duaning iwang pamargi manawi nilar sesana.
- (2) Nganorayang utawi ngentosin Prajuru utawi Dulu-Dulu patut sajeroning paruman tur kaingkupin antuk Krama Desa

Palet 3 Indik Kulkul Pawos 15

- (1) Kulkul ring Desa, luwire :
ha. Kulkul Desa;
na. Kulkul Banjar;
ca. Kulkul ring Pura soang-soang;
ra. Kulkul Subak Abian;
ka. Kulkul Sekaa-sekaa.
- (2) Tabuh Tatepakan kulkul Desa :
ha. Kalih tuludan, tatengeran tedun ngayah;
na. Atuludan bulus, tatengeran kapancabhayan.
- (3) Tatengeran kulkul Banjar :
ha. Kalih tuludan tengeran ngawit nglaksanayang pakaryan utawi parum;
na. Atuludan alon tengeran patedunan wangde;
ca. Tigang (3) kelentungan, tatengeran ngarorod (nganten);
ra. Tigang (3) kelentungan tengeran mapradang miwah pakandalan;
ka. Siya (9) kelentungan wenten sinalih tunggil warga sane seda;

Pawos 16

- (1) Kulkul Desa utawi Banjar tan wenang katepak yening tan sangkaning pituduh Prajuru Desa utawi Prajuru Banjar sejawaning tengeran kapancabhayan.
- (2) Sang nepak tan sangkaning pituduh patut digelis atur supeksa maka buatan panepake, yan tan sapunika sang mamurug kadanda manut pararem.
- (3) Suaran kulkul tengeran kapancabhaya patut katedunin antuk warga sahaa makta gagawan anut bhaya;
- (4) Kulkul sekaa-sekaa, semalih kulkul pondokan tan kalugra nyawerin (matehin) sukat utawi tengeran kulkul Desa/Banjar, prade mamurug taler kadanda manut pararem.

Palet 4 Indik Paruman Pawos 17

- (1) Paruman utawi sangkepan ring Desa Pakraman Penglumbaran Kangin, wenten :
ha. Paruman Desa/Banjar kawentenang :

1. Paruman ring Gebog Satak Tiga Buungan kawentenang nangken Anggara Kasih;
 2. Paruman Desa kawentenang nangken rahina Anggara Kliwon.
 3. Paruman Banjar kawentenang nangken Saniscara Kliwon;
 4. Napkala (patgata kala) maka jalaran arah-arah manut tatujon.
- na. Sangkepan Prajuru utawi Dulun Desa, kawentenang manut wiguna;
- ca. Paruman sekaa-sekaa manut babuat.
- (2) Paruman Desa utawi Banjar madudonan sakadi ring sor :
- ha. Prasida lumaksana risampun katedunin antuk sang patut ngamiletin , kamanggala antuk tengeran kulkul miwah mabusana adat, saha tan kalugra makta gegawan sakaluwire : tan maren ngarcana ring ida Bhagawan Penyarikan saha Ida Widhi Whidana Cane;
- na. Maka sarana janggi tigang (3) kacoran pangawit kalaksanayang sep-sepan saha riwusannia nyacah dadosan gung alit manut pararem;
- ca. Tan kalugra ngawetuang suara ghora utawi byuta, yan wenten asapunika keni pamidanda beya pacamil kadi dandaning nguman-uman ring sabha;
- ra. Pamutus babawos beriuk sapanggul (ingkup) punika kamanggehang.
- (3) Prade pidaging paruman tan kacumponin, mangda Prajuru Desa utawi Banjar ngilikang babawos, saha putusannia mangda kararemang antuk Krama Desa utawi Banjar, malih prade tan prasida kasungkemin jantos ping tiga, Prajuru Desa utawi Banjar dados nunas bawos ring Kerta Desa manut undagan luwire kamanggehang paingkupan prajuru, ngararis panglingsir, panguntat paruman.

Pawos 18

- (1) Sajeroning paruman Desa, Bendesa patut nyiarang pamargi ngenterang desa, pamekas nganinin indik :
- ha. Munjuk lungsuring pakraman saha ayah-ayah, sulur arta berana, druwen desa;
- na. Pidabdab Prajuru nganinin usaha desa kapungkur
- (2) Pamutus paruman desa sinanggehang pararem, maka pamitegep pamargin awig-awig.

Pawos 19

- (1) Sangkepan Prajuru Desa ngawedarang rarincikan usaha desa kapungkur.
- (2) Sangkepan Prajuru utawi Dulun Desa tan kawenang ngawedalang tategenan ring krama sadereng kaingkupin antuk Krama Desa.
- (3) Pamutus sangkepan Prajuru utawi Dulun Desa ngawetuang paswara, maka daging pituduh sang ngawewenang utawi ngonekang pecak pararem Krama Desa

Palet 5 Indik Druwen Desa Pawos 20

- (1) Padruwen Desa Pakraman Penglumbaran Kangin sekadi ring sor :
- ha. Kahyangan Desa, luwire :

1. Kahyangan Tiga;
 2. Pura Manik Tirta;
 3. Pura Dukuh.
- na. Bale Desa Pakraman Penglumbaran Kangin
- ca. Tanah Tegalan
- ra. Karang ayahan Desa, karang ring ajeng
- ka. Setra-setra palebahan, makadi setra rare lan setra.
- da. Pelaba Pura Desa Pakraman Penglumbaran Kangin
- ta. Lelanguan, minakadi tatabuhan lan ilen-ilen padruwen Banjar, luwire :
1. Gong Banjar, Gong abarung, Geguntangan;
 2. Ilen-ilen wali Pura : Rejang, Pendet, Baris, Jojor;
 3. lekita-lekita, luwire pipil krama, awig-awig, paswara lan pararem
- sa. Nyasa, Sasanthi;
- wa. Lembaga Perkreditan Desa (LPD);
- (2) Olih-olihan Desa Pakraman Penglumbaran Kangin., luwire :
- ha. Urunan Krama Desa Pakraman;
- na. Paica saking Guru Wisesa;
- ca. Dana punia siosan, sane patut.

Pawos 21

- (1) Nyabran pasangkepan desa, Prajuru pangamong druwen desa ngawentenang parindik munjuk lungsuring padruwen desa ring krama desa.
- (2) Sakaluwir druwen desa patut wenten ilikitannya.
- (3) Tan kalugra ngadol utawi ngesahang padruwen desa
- (4) Pidabdab indik kawentenan Lembaga Perkreditan Desa (LPD) manut pararem.

Palet 6

Indik Panyanggran Banjar

Pawos 22

Krama Desa rikala ngawentenang karya suka-duka, patut kasanggra antuk Banjar, luwire :

- ha. Prade ngwangun pitra yadnya utawi manusa yadnya, manut pinunas sang mayadnya;
- na. Pangrombo utawi karya apuputan
- ca. Panguing pitra yadnya, prade saking semengan ngantos wengi, katuran panguing ping kalih.

**CATURTAS SARGAH
SUKERTA TATA AGAMA**

Palet 1'

Indik Dewa Yadnya

Pawos 23

- (1) Palinggih Panyiwian sawidangan Desa Adat Pakraman Penglumbaran Kangin, luwire :
 - ha. Pura Kahyangan Tiga : Pura Desa utawi Bale Agung, Puseh, Dalem;
 - na. Pura Manik Tirta;
 - ca. Pura Dukuh;
- (2) Rahina piodalan soang-soang Kahyangan inucap, kadi ring sor :
 - ha. Ring Kahyangan Tiga, luwire :
 1. Pura Desa/Bale Agung, rikala Purnama Kelima
 2. Pura Puseh, rikala Buda Wage Kelawu;
 3. Pura Dalem, rikala Sukra Kliwon Sungsang.
 - na. Pura Subak Abian, kamargiang awarsa apisan manut sasih rikala ngamargiang upakara Penyungsungan
 - ca. Pura Dukuh, rikala Anggara Kasih Medangsia
- (3) Siyosan ngamargiang piodalan ring wawidangan Desa Pakraman Penglumbaran Kangin, taler nyarengin rarahinan/piodalan ring Gebog Satak Tiga-Buungan, sakadi ring sor puniki :
 - ha. Maturan Canang ring Pura Dalem Pingit;
 - na. Maturan Canang ring Pura Desa Puseh Asti Tiga Buungan;
 - ca. Nyungsung, Ngarawuhang Ratu Dalem Pingit, tatakala Beteng Kliwon Enyitan;
 - ra. Nyambalin, tatkala Pasah Kliwon Enyitan;
 - ka. Ngantukang Ratu Dalem Pingit, tatkala Kajeng Kliwon Uwudan;
 - da. Nyaga Desa, Nyepi Desa, saha ritatkala Nyepi Desa sami Warga Gebog Satak Tiga Buungan ngamargiang brata amati karya ngantos kasuarayang gendongan cihna pangembak;
 - ta. Panca Segeh Sasih Kapitu;
 - sa. Ngemping, Sayut Katipat, Nyacahin;
 - wa. Karya Ngusaba ring Pura Dalem Pingit kawentenang tigang warsa apisan, anut pituduh Sang Sadaka utawi Jro Pasek.
- (4) Pangaci ring Pura inucap manut kecap sastra agama, saha kalaksanayang nista, madya, utama nganutin kawentenan lan pararem.
- (5) Pangempon soang-soang Pura manut dresta kadi ring sor :
 - ha. Pura Desa kaempon antuk Krama Desa;
 - na. Pura Puseh kaempon antuk Krama Desa;
 - ca. Pura Dalem kaempon antuk Banjar;
 - ra. Pura Manik Tirta kaempon antuk Krama Desa lan Banjar;
 - ka. Pura Dukuh kaempon antuk Krama Dadia

Pawos 24

- (1) Ring soang-soang Pura inucap kawentenang Pamangku.
- (2) Ngadegang Pamangku manut dudonan:

- ha. Nyanjan utawi masemurang, soang-soang mapiteges mapinunas ring ajeng panataran wiadin ke Pura Desa manawi ring balian sonteng, lan sapanunggilannia;
- na. Turunan utawi ngwaris;
- ca. Kacatri, kapilih, katunjuk olih Krama Desa.
- (3) Tan kawenang kaanggen Pamangku, luwire :
- ha. Cedangga, luwire peceng, perot, cungh lan sapanunggilannia;
- na. Sang sapasira ugi sane tan kapatutang manut pararem;
- ca. Sakit ila, ayan, buduh;
- ra. Sane madrebe kasucian urip tan becik.
- (4) Prabea kapamangkuan :
- ha. Madiksa Widhi (ngawintenin) kamedalin saha kalaksanayang antuk sang ngadegang makadi krama desa utawi pangempon pura soang-soang;
- na. Pitra Yadnya riwekas, patut kasungkemin antuk krama desa utawi pangemong sanistania brahma prayascita manut pararem.
- (5) Pamangku patut ngamanggehang sasaning pamangku, luwire tan wenang ajejuden miwah sane siosan.

Pawos 25

- (1) Swadharmaning pamangku, luwire :
- ha. Ngenterang upacara piodalan ring Kahyangan utawi ring soang-soang pakubon krama;
- na. Tan wenang salab-sulub, yan mamurug wenang pamangku inucap nyepuhin raga;
- ca. Prade salah sinunggil pamangku kapialang utawi cuntaka, kengin nyelang pamangku Kahyangan Tiga siosan;
- ra. Samalih yan sampun pamangku ngayah tigang rahina ring Pura, kancit wenten kulawargania utawi pisaga lan pangarep lina, pamangku inucap tan keneng cuntaka, sakewanten pamangku tan budal salami piodalan.
- (2) Petias utawi olih-olihan pamangku, luwire :
- ha. Panyolasan miwah sarin canang;
- na. Luput pekaryan rerampen/pedagingan keni kadi patut.

Pawos 26

- (1) Pamangku kagentosin riantukan :
- ha. Lina;
- na. Pinunas ngaraga, manawi sungkan-sungkakan lan sapanunggalannia;
- ca. Kawusang antuk krama manawi malaksana sane tan patut (asta-dusta)
- (2) Prade pamangku kawusang sangkaning melaksana asta-dusta, keni pamidanda manut pararem saha ngawaliang prabea pawintenan pecak.

Pawos 27

Kasukertan Kahyangan ring Desa :

- (1) Sane nenten kalugra ngranjing ka Pura, luwire :

ha. Sang katiba cuntaka, makadi sebel ngaraga :

1. Sebel kandel, ngeraja sewala, salami dereng mabersih;
2. Sebel madruwe putra, sajeroning 42 (abulan pitung dina) rahina, kruron;
3. Sebel pangantenan, sadereng mabyakala.
4. Cuntaka sangkaning kapademan manut senger salami 42 (abulan pitung dina) rahina utawi sadereng nglaksanayang upakara Masapuh/Nyeeb Brahma

na. Makta sahananing sane kasinanggeh ngaletihin;

ca. Wawalungan suku pat, sawawaning ritatkala mapapada;

ra. Mabusana sane tan manut kadi tata caraning ngranjing kapura;

ka. Anak alit sadereng mayusa 3 (tigang) sasih;

da. Sadereng polih wak-wakan (pituduh) Prajuru Desa Pakraman.

(2) Busana ngranjing kapura wenang nganutin dresta minakadi :

ha. Ritatkala ngaturang ayah, mawastra lan nylempot;

na. Ritatkala ngaturang sembah, mabusana jangkep;

ca. Siosan kadi ring ajeng nenten kalugra, sawawaning sampun pituduh prajuru.

(3) Parilaksana tan kawenangan ring Pura, luwire :

ha. Mabawos sane kasinanggeh wak purusya, wak capala;

na. Makoratan / mabacin, mawarih, masanggama;

ca. Masumpah utawi macoran, sawawaning pituduh prajuru desa;

ra. Ngias raga, sawawaning Pandita miwah Pinandita;

ka. Munggah tedun Palinggih, sawawaning pituduh prajuru desa.

(4) Sang mamurug kadi kecaping ring ajeng, keni pamidanda pamerayascita sepatutnyane.

Pawos 28

(1) Yan wenten jadma karawuhan ring Pura, kengin patut kapintonin prade rumasa kasumangsayan, yan tan wiakti jadma inucap kasisipan kadanda prayascita manut pararem.

(2) Prade Kahyangan kahanan dur manggala, minakadi kapancabhaya, Pamangku patut digelis nyadokang ring prajuru mangda marumang Krama Desa tur ngawentenang upacara sepatutnyane.

Palet 2

Indik Rsi Yadnya

Pawos 29

(1) Sang pacang madeg Pandita utawi Pinandita minakadi Balian Sonteng, Kebayan, saluwire jagi ngenterang yadnya patut masadok ring Prajuru Desa, kalih Parisadha Hindu Dharma Indonesia.

(2) Prajuru Desa patut nitenin tur wenang ngalengin, prade wenten kacihna lempas ring kakecap miwah drestane, tur sareng nyaksinin upacara saha nyiarang ring paruman desa tegap rauhing wates kawenangan pangenter yadnya.

(3) Krama Desa patut ngaturang ayah sapamadeg miwah ring panglepas sang sulinggih riwekas katuntun antuk Prajuru.

Pawos 30

- (1) Sang sulinggih patut ngariyining ngayunin ring wawidangan jagat Pakraman Penglumbaran Kangin sesampune wawu muputang yadnya ke jebar jagat utawi ke dura desa.
- (2) Krama Desa sami patut nitenin katuntun antuk Prajuru, mangda sahanan yadnya sane kawentenang kaicen pamuput olih Pandita utawi Pinandita manut kawenangannia soang-soang.

Palet 3 Indik Pitra Yadnya Pawos 31

Dudonan pamargin Pitra Yadnya :

- (1) Pangupakaran sang lina:
ha. Antuk mendem, maka cihna pakingsan ring Ibu Pertiwi utawi ring Bhatara Brahma selami nuptupang prabeya
na. Atiwa-tiwa (upacara pangabenan utawi palebon)
- (2) Upacara-upacara Pitra Yadnya riwusan kaabenang mawastu munggah daun bingin (ngroras) risampune wawu ngamargiang nglinggihang Dewa Hyang (Bhatara-Bhatari).
- (3) Kangkat ngamargiang Upacara Pitra Yadnya Nandang Mantri miwah Maperororas masenger 42 (abulan pitung dina) rahina, saha patut kasaksinin antuk Dulu Saing 16 (enem belas).

Pawos 32

Swadharmaning lan tategenan krama prade wenten sinalih tunggil warga lina;

- (1) Sang kaduhkitan patut:
ha. Nyadokang ring Kelian tur nunas tatimbangan ring kawentennia;
na. Ngaturin Banjar ngrombo makarya eteh-ete sawa kadulurin panyembrama canang sasidan antuk.
- (2) Swadharmaning Banjar/Desa :
ha. Kelian Banjar maritatas pamargin sang kaduhkitan, napike pacang kapendem makingsan riyin utawi lantur kaabenang;
na. Prade kapendem, raris kawentenang kulkul patau manut pawos 15 (3) aksara na, antuk Kelian Banjar utawi wakilnia;
ca. Penyanggran Banjar selanturnia :
 1. Soang-soang Krama Banjar keni patus manut pararem;
 2. Ngrombo ngaryanin eteh-ete sawa saha kasarengin antuk krama sane rauh, maaksian;
 3. Sami Krama Banjar jangkep sareng Krama Truna-Truni nganter ka setra jantos pamendem puput;
 4. Tan kengin sawa langkungan ring 7 (pitung) rahina, tur patut polih gebagan manut paetangan Kelian Banjar;
 5. Tan kalugra nginepang bangbang.
- (3) Prade wenten lina, rikala piodalan ring Pura, kengin mendem tan pasadok tur mamargi wengi.
- (4) Tan kalugra mendem sawa rikala :

ha. Wuku was panganten;
 na. Semut sedulur;
 ca. Kala gotongan;
 ra. Rarung pagelangan : Wraspati pananggal/panglong ping 6 (enem);
 ka. Gagak anungsung pati, pananggal ping 9 (siya);
 da. Ingkel wong;
 ta. Rarahinan jagat :

1. Purnama;
2. Tilem;
3. Prawani;
4. Kajeng Kliwon ;
5. Pasah;
6. Buda Kliwon;
7. Tumpek;
8. Buda Wage (Buda Cemeng);
9. Anggar Kasih (Anggara Kliwon);
10. Saniscara Umanis Watugunung;
11. Redite Umanis Ukir (Odalan Bhatara Guru);
12. Wuku Walanggati, pananggal ping 11 (solas);

sa. Wuku Langkir ngantos Buda Kliwon Pahang (buncal balung);
 wa. Sasih kadasa (10) tanggal ping 13 (telulas)
 la. Dewasa kekeran manut Desa Pakraman.

- (5) Prade sane lina ngadut manik, patut manik inucap kawijilang riin wawu kaupakara.
- (6) Prade pacang mendem sawa ring Setra Desa Pakraman sane saderengnyane, tan ngranjing dados warga utawi mawit saking warga dura desa patut nawur pananjung batu, akehnyane manut pararem.

Pawos 33

- (1) Sane kasinanggeh kacuntakan sakadi ring sor :

ha. Cuntaka antuk lina;
 na. Cuntaka antuk ngeraja sewala;
 ca. Cuntaka antuk ngembasang putra;
 ra. Cuntaka antuk kruron;
 ka. Cuntaka antuk pawiwahan;
 da. Cuntaka antuk gamia gamana;
 ta. Cuntaka antuk salah timpal;
 sa. Cuntaka antuk sakit ila/buduh;
 wa. Cuntaka antuk yaning wenten anak istri mobot nenten kaupakaran pabyakawonan tur pawidi widana;
 la. Cuntaka antuk mamitra ngalang;
 ma. Cuntaka antuk wenten istri ngawentenang putra sadurunge maupakara pabyakawon tur pawidi widana.

- (2) Sengker cuntaka manut kawentenannia :

ha. Cuntaka kelayu sekaran, cuntakannia kantos 42 (abulan pitung dina) rahina saha sampun masapuh manut dresta
 na. Cuntaka ngraja sewala, 3 (tigang) rahina ngawit saking ngraja sewala utawi selamaning ngraja sewala;

- ca. Cuntaka ngembasang putra, 42 rahina (abulan pitung dina) ngawit saking putrane embas, utawi ngantos sampun kaupaka makambuhan tur maprayascita manut sakadi agama lanang wiadin istri;
 - ra. Cuntaka kruron, abulan pitung dina (42) rahina tur sampun matirta pamerascita;
 - ka. Cuntaka pawiwahan, cuntakannia ngantos sesampune matirta pabyakawonan;
 - da. Cuntaka gamia gamana, cuntakannia ngantos sesampune kapalasang / masapihan tur sampun kawentenang pamerascita raga tur sampun kawentenang pamerascita Desa Pakraman/Kahyangan;
 - ta. Cuntaka salah timpal, kapuputang sakadi ring agama Hindu tur dresta/adat;
 - sa. Cuntaka anak istri mobot nenten kawentenang upakara pabyakawonan, cuntakannia ngantos kawentenang upakara pabyakawonan;
 - wa. Cuntaka mamitra ngalang, cuntakannia ngantos kawentenang upakara pa byakawonan/ngayahang panyeeb;
 - la. Ngembas putra nenten kawentenang upakara pawidi widana, cuntakannia ngantos wenten sane mameras sang putra, tur sampun kawentenang upakara sakadi ring ajaran agama Hindu.
- (3) Cuntaka kelayu sekaran/kapademan :
- ha. Kapendem cuntakannia :
Kulawargannia sajeroning pekarangan ngantos 42 (abulan pitung dina) rahina;
 - ca. Kaaben cuntakannia :
Sang nyambut karya Pitra Yadnya cuntakannia ngawit saking ngrancang karya rawuh riwus yadnyania (mapegat).
- (4) Tan keneng cuntaka, luwire :
- ha. Sang Sulinggih lan Pamangku Kahyangan Tiga;

Pawos 34

- (1) Atiwa-tiwa (pangabenan) kamargiang madasar antuk :
ha. Nyawa Resi (nyuasta geni), santukan tan ngagah utawi manawi tan kakeniang;
na. Sawa prateka.
- (2) Panemaya pangabenan wenten 2 (kalih) pawos :
ha. Ngaben dadakan/bah bangun, kadadosang sajeroning masengker awuku utawi 7 (pitung) rahina;
na. Ngaben ngemasa.
- (3) Dudonan pangabenan ngawit saking ngeplugin (lina), ngeseng ngantos pangiriman utawi nganyut.

Pawos 35

- (1) Papatusan pangabenan wenten kalih pawos :
ha. Ngaben ngamasa, manut pararem;
na. Ngaben dadakan, manut pararem.
- (2) Pangingune ring Krama Banjar ngawit makarya anut abot dangan kawentenang karya.

Palet 4
Indik Manusa Yadnya
Pawos 36

- (1) Manusa Yadnya inggih punika upacara-upacara dharmaning kauripan manusa, ngawit saking patemonig kama bang lan kama petak sajeroning garba ngantos lampus ri werkas.
- (2) Upacara kadi ring ajeng madudonan sakadi ring sor :
 - ha. Magedong-gedongan duk pangerempinian ibiang;
 - na. Duk sang rare medal;
 - ca. Kepus Udel;
 - ra. Roras rahina;
 - ka. Tutug kambuhan (42 rahina);
 - da. Tigang sasih (3 bulan);
 - ta. Pawetuan/oton/odalan (6 bulan);
 - sa. Tutug kelih (ngaraja wadone, ngembakin lanange);
 - wa. Metatah/mapandes;
 - ia. Mawiwaha;
 - ma. Mawinten.
- (3) Upacara-upacara inucap kamargiang nista, madya, utama manut sastra agama saha catur dresta, maka buatan desa dresta, manut sima cara desa.

Palet 5
Indik Bhuta Yadnya
Pawos 37

- (1) Bhuta Yadnya inggih punika upacara-upacara : biakala ring pertiwi lan kahyangan, sarwa prani saha upacara-upacara ring bebutan.
- (2) Upacara pabiakala ring sarwa prani, luwire :
ha. Ring sarwa tumuwuh ri kala Tumpek Pengatag (Saniscara Kliwon Wariga)
na. Ring sarwa ingon-ingon ri kala Tumpek Kandang (Saniscara Kliwon Uye)
ca. Upacara pakala-kalan manusa manut wiguna kabawos pabiakala.
- (3) Upacara pabiakala ring pertiwi, kahyangan lan babutan kawastanin macaru.
- (4) Pacaruan inucap ring ajeng nista, madya, utama manut wiguna kadi ring sor :
ha. Eka Sata; ka. Tawur Agung
na. Panca Sata; da. Panca kelud;
ca. Panca Sanak; ta. Balik Sumpah
ra. Resi Gana;
- (5) Sajawaning kadi ring ajeng kawentenang upacara :
ha. Majot-jotan utawi yadnya sesa nyabran wusan ngarateng.
na. Masapuh-sapuh rikala pacang wali ring Pura.

Pawos 38

- (1) Nangkén ngawarsa rikalaning Tilem Kesanga kawentenang Tawur Kesanga, ketah kabawos Ngerupuk, maka cihna pacang mapag rahina Penyepian benjangne.

- (2) Upacara penyepian sane kamargiang antuk Krama Desa :
 - ha. Amati geni : tan kengin maapi-api;
 - na. Amati karya : tan kengin nyambut karya;
 - ca. Amati lelanguan : tan kengin maoneng - oneng, masuara gora. lan sapanunggilannya;
 - da. Amati lelungan : tan kengin malancaran.
- (3) Pabrataan inucap kamargiang sakeng semeng ngantos ngedas lemah.
- (4) Sang mamurug kecaping ajeng keni pamidanda manut pararem ring Banjar/tempek soang-soang kamargiang antuk petilik (Pecalang Desa)
- (5) Riwus rahina Nyepi (benjangne) maka cihna pengawit Içaka Warsa patut soang-soang warga desa saling ngaksama (Dharma Santi)

PANCAMA SARGAH SUKERTA PAWONGAN

Palet 1

Indik Pawiwahan

Pawos 39

- (1) Pawiwahan inggih punika patemoning purusa pradana malarapan panunggalan kayun suka cita kadulurin upasaksi sekala-niskala.
- (2) Pamargin pawiwahan, luwire :
 - ha. Pepadikan, kamanggala antuk pakrunan;
 - na. Ngrorod, ngrangkat riin wawu kakrunayang;
 - ca. Nyeburin utawi sentana nyeburin risampun nganutin upakara pamerasan.
- (3) Pidabdab sang pacang mawiwaha patut :
 - ha. Sampun manggeh daha truna (prasida nganutin Undang-undang Perkawinan)
 - na. Sangkaning pada rena (tan kapaksa)
 - ca. Kasudiang prade pangambile sios agama.
- (4) Pamargin pawiwahan mangda nganutin Undang-undang Perkawinan saking ngawiwenang.

Pawos 40

- (1) Pawiwahan sane kapatutang ring Desa sakadi ring sor :
 - ha. Sampun kamargiang pabiakala utawi kasaksiang sekala - niskala antuk pandita/pinandita;
 - na. Wenten pasaksi prajuru sane mapakilingan utawi ngilikitayang pawiwahan;
 - ca. Pinaka pitegep upasaksi ring niskala, patut ngaturang pakandal utawi parebuan ring Parhyangan Desa lan Parhyangan Banjar, indik sarana upakara anut pidabdab pararem;
 - ra. Keni Prabeya pangelus kerob akehnyane manut pararem, ring sang ngambil prade sang mawiwaha kesios desa;
- (2) Parabian sane tan manut kadi ring ajeng sinanggeh tan patut
- (3) Prade sang mawiwaha tan nganutin pidabdab (1) aksara ca, tan kadadosang ngranjing ke Parhyangan Desa lan Parhyangan Banjar.

Tata caraning parabian :

- (1) Sapa sira ugi pacang ngewarangan pakulawargan patut masadok ring prajuru, selanturnia prajuru maritatas, manut tan manut kakecap parabiane;
- (2) Pamargin papadikan anut dudonan :
 - ha. Pakrunan wantah apisan, antuk canang taksu kapuputang antuk mapradang lan pakandal;
 - na. Risampun mapragat raris sang istri kaajak budal ring pakubon sang lanang, saha kalanturang antuk pabiakala.
 - ca. Mangda puput tumus sekala-niskala, raris kulawarga purusa makta pejati ring merajan wadone.
- (3) Prade ngrorod utawi merangkat patut :
 - ha. Reraman lanange ngawentenang pamalaku antuk duta saksi sakirangnya 2 (kalih) diri;
 - na. Pagenahan antene tan kengin ring pakubon sang lanang sadereng mabiakala.
- (4) Sajeroning pakrunan/pangalakuan patut :
 - ha. Kamanggala sakeng ramarena purusa antuk geng pangampura majeng ring reraman wadone;
 - na. Kaigumang bawos indik-indik pakidih utawi palegayan arep ring pasewakan sang ngidih saha dewasa pakerabkambeane wekas;
 - ca. Kacihnayang indik kapurusa utawi prade sentana rajeg kajejerang kapatutang ngidih anak lanang sane kabawos pawiwahan nyeburin, tur risampun sulur pamerasan kategepin kamanggehang sentana nyeburin.
 - ka. Prade tan terima pejati pakrunan kamargiang jantos ping tiga, yening antene sampun nganutin pidabdab sang pacang mawiwaha, upakara patut kalaksanayang saha kamanggala antuk Prajuru.
- (5) Pakerabkambean mapiteges upacara tinas apadang (puput) mapikuren.

Duaning manut sakadi ring sor :

 - ha. Sajeroning kabawos ambe, kalaksanayang ring sekala niskala antuk sarana jajauman miwah pawidi widana :
 1. Jajauman pinaka ngambe/ngadungang kayun soang-soang pakulawargan wadone;
 2. Widi widana pinaka pejati niskala nunas wadone ring pamerajan kamulannya.
 - na. Sajeroning bawos kerab kambe palaksana ring sekala :
 1. Antuk panyaksi Krama Banjar, duaning kakerabin manawi antuk tengeran kulkul;
 2. Pamekas panyaksi prajuru saha ngilikitayang.

Palet 2
Indik Nyapian
Pawos 42

- (1) Pawiwahan prasida kawusang malarapan antuk palas merabian utawi kepadaman.
- (2) Wusan mapikuren riantukan salah sinunggi lina mapiteges balu, makadi balu lanang utawi istri.
- (3) Palas merabian inggih punika sangkaning mawiwit wicara.

- (4) Sang ayat palas merabian patut atur supeksa pailikitan riin ring sang rumawos (Pengadilan Negeri) wasu tinas apadang pamutuse kabawos nyapian, wawu prajuru/dulu nyiarang kawentenannia ring desa saha keni pamelin kulkul manut pararem.

Pawos 43

- (1) Tata cara palas merabian sakadi ring sor:
ha. Nawur prabeya pasaksi sinalih tunggil sami matenga;
na. Pagunakayan polih pahan pada;
ca. Pabekel, tadtadan soang-soang kakuasang niri-niri, sakewanten indik warisan kakuasang antuk purusa;
ra. Ngaweruhin miwah ngupajiwanin pratisentana manut swadharmaning guru rupaka;
ka. Nawur pamidanda panumbas suaran kulkul manut pararem;
- (2) Prade riwekas sang palas kacihna adung malih, patut :
ha. Ngamargiang pawiwahan malih
na. Kadanda nikel saking palase.

Pawos 44

- (1) Sang balu kabinayang dados :
ha. Balu luh wit sentana(sentana rajeg) miwah balu luh boya sentana;
na. Balu muani kapurusa (wit sentana) miwah balu muani nyeburin (boya sentana nyeburin).
- (2) Swadharmaning balu inucap patut :
ha. Ngamanggehang patibrata tan patut ngamargiang paradara/drati krama;
na. Nguwasayang waris gunakaya, tan dados ngadol, ngadeang, makidihang lan siosan punika, sajawaning kabebasan sakeng pianak utawi kulawarga pinih tampek sakeng rabine prade okane kantung alit-alit;
ca. Kengin ngidih sentana prade wenten kacumpuin antuk kulawarga sinanggeh kapurusa;
ra. Kawenangang mawiwaha malih yan wenten kabebasan manut aksara ring ajeng.
- (3) Balu kaucap tan pageh sakadi ring sor :
ha. Drati krama utawi paradara;
na. Matilar saking pakubon tan pasadok jantos awarsa;
ca. Lempas ring swadharma sewos-sewosan tan prasida ngesehin solah maprawerti marep ring pituduh kulawarga purusa.

Pawos 45

Sapa sira ugi Warga Desa Pakraman Penglumbaran Kangin tan kapatutang ngarabi wong arabi, prade mamurug kadanda manut pararem saha prade wicarannya tan prasida kabawosin ring pakraman patut kasukserah ring sang ngawewenang.

Palet 3
Indik Sentana
Pawos 46

- (1) Sentana wenten kalih pawos, sane kaucap pratisentana miwah sentana paperasan.
- (2) Pratisentana inggih punika sentana sane metu saking pawiwahan kapatut.
- (3) Prade pawiwahan tan ngawetuang sentana kengin ngidih sentana antuk upasaksi sekala-niskala sane kawastanin sentana paperasan.
- (4) Prade pawiwahan tan kapatut ngawetuang sentana, mangda tan kantun kawastanin babinjat utawi astra patut kamanggala antuk panyangaskara.
- (5) Sentana rajeg inggih punika, pratisentana wadon (pradana) sane kamanggehang lanang (purusa) tur risampun nglaksanayang pawiwahan nyeburin.
- (6) Sang sane kaarsayang sentana rajeg inucap wiwit (5) inggih punika :
ha. Pratisentana wadon tunggal utawi silih sinunggil pratisentana wadon yaning
maka sami pratisentana wadon;
na. Sampun kamanggehang dados pratisentana (purusa);
ca. Kapawiwahan kaceburin, kautsahayang antuk jatma sane maagama Hindu
utawi jatma sane maagama siosan sane sampun nglaksanayang pamarisuda
raga utawi sudi wadani;
ra. Sane manggehang sentana rajeg patut mapasadok ring I Prajuru Banjar tur I
Kelian Banjar patut nyiarang ring banjar saha ngaturang ring prajuru desa
pakraman

Pawos 47

- (1) Ngangkat sentana manut dudonan patut maka cihna artha berana pamerasan sane kasaksiang sekala-niskala.
- (2) Krama Desa pacang ngidih sentana patut masadok ring Bendesa sanistane asasih sadurung pamerasan.
- (3) Bendesa kawakilin antuk Kelian Banjar nyiarang ring sawidangan desa, sang sapa sira ugi rumaksa tan lila mangda masengker kalih wuku sadurung pamerasanmasadok ring Bendesa.
- (4) Prajuru/Dulu Desa digelis mawosin saha ngicenin pamutus nepek ring catur dresta miwah pararem.
- (5) Prade sulur paperasan tan manut kecaping ajeng, prajuru/dulu desa wenang ngandeg sang pacang makarya, saha ngicenin pamutus mangda kapuputang riin babawosan sulur utawi wicarannia.

Pawos 48

- (1) Paperasan sane kapatut ring desa risampun maka cihna :
ha. Widi widana paperasan;
na. Kasaksinin antuk prajuru desa sane makelingan utawi ngilikitayang;
ca. Kasiarang ring wawidangan desane.
- (2) Sane kapatut peras anggen sentana, kadi ring sor :
ha. Jatma maagama Hindu;

- na. Kulawarga saking purusa, prade tan wenten kengin saking wadon, yaning taler tan wenten wawu kengin sakama-kama (sakeng kayun);
 - ca. Kautamayang saking waris pancer kapurusa;
 - ra. Sinalih tunggal mawiwit saking kulawarga tunggal sanggah utawi merajan, paibon lan dadia, utawi ngambil anak tios sakewantensang maagama Hindu.
- (3) Kengin ngangkat sentana langkung ring adiri, lanang wiadin wadon.

Palet 4
Indik Warisan
Pawos 49

- (1) Warisan inggih punika artha berana saha ayah-ayahan ngupadi sukerta sekala-niskala saking kaluhurannia arep ring turunannia.
- (2) Karang sinanggeh warisan, luwire :
 - ha. Duwe tengah, makadi tegal ayahan desa, kahyangan, pusaka siwa karana, lan sane siosan;
 - na. Pagunakaya, tadtadan/jiwa dana, hutang piutang;
 - ca. Pamerajan utawi Sanggah.
- (3) Wawu kengin kabawos warisan prade wenten :
 - ha. Sang mapiturun (pawaris);
 - na. Katurunan (ahli waris);
 - ca. Artha berana tategenan (ayah-ayahan) maka cihna warisan.

Pawos 50

- (1) Ahli waris, luwire :
 - ha. Pratisentana purusa;
 - na. Pratisentana (sentana rajeg);
 - ca. Sentana paperasan (lanang/wadon).
 - (2) Prade tan wenten sakadi ring ajeng kang sinanggeh ahli waris :
 - ha. Turunan purusa pernah ngunggahang makadi rerama lanang, pekak selanturnia, rerama misan, mindon;
 - na. Turunan purusa pernah kasamping makadi kaponakan di misan miwah mindon.
- Swadharmaning ahli waris patut :
- ha. Nerima saha ngutsahayang tatamian pahan kaluhurannia, makadi ngempon Sanggah/Merajan, Pura, saha pangupakaryannia miwah ayah-ayahan pawaris;
 - na. Ngabenang pawaris saha ngalanturang uapacara-upacara Pitra;
 - ca. Nawurin hutang-hutang pawaris manut panglokika.

Pawos 51

Mungguhing waris ke waris ring Desa Pakraman Penglumbaran Kangin

- (1) Risampun kalaksanayang Pitra Yadnya lan hutang-hutang pawaris buntas katawur, wawu warisan dados kepah.

- (2) Para ahli waris sami polih pahan sangkaning pagunakaya, sajawaning karang/tegal ayahan desa kaemong antuk ahli waris kang sinanggeh krama ngarep.
- (3) Sinalih tunggil ahli waris kengin tan polih pahan prade :
 ha. Nilar kawitan lan sesananing agama;
 na. Alpaka guru rupaka;
 ca. Sentana rajeg kesah mawiwaha utawi pratisentana nyeburin soang-soang kabawos ninggal kadaton.
- (4) Boya ahli waris, kengin muponin hasil manut dudonan, luwire :
 ha. Sentana luh, selami durung kesah mawiwaha;
 na. Balu luh wiadin muani nyeburin (soang-soang boya sentana).
- (5) Pawaris kengin maweweh rikala maurip pinaka jiwa dana, tadtadan/bekel, maka cihna paweweh tetep ring okane sane mawiwaha.

Pawos 52

- (1) Prade sajeroning pakulawargan wenten ahli waris langkungan ring adiri patut :
 ha. Kawentenang paigum indik pedum waris inucap;
 na. Yan tan prasida ngatunasang tatimbang ring dulu-dulu desa (Kerta Desa);
 ca. Prade taler tan wenten cumpu ring panepes Kerta Desa, patut kadauhang ring kerta desa prade taler tan kacumpunin, kengin katunasang ring sang rumawos (Pengadilan Negeri).
- (2) Prade karang inucap kaputungan, patut prajuru/dulun desa nibakang ring :
 ha. Sang sinanggeh ahli waris manut pawos 50;
 na. Sang kengin anggen sentana manut pawos 54 (2) miwah (3);
 ca. Prade taler tan wenten cumpu ring panepas Kertha Desa, kengin kautsahayang ring sang rumawos (Pengadilan Negeri).

SAD SARGAH SUKERTA TATA PALEMAHAN

Palet 1

Indik Bhaya

Pawos 53

- (1) Pariindikan bhaya luwire : jiwa bhaya, artha bhaya (kapandangan), dura cara ring agama.
- (2) Sang manggihin kahanan jiwa bhaya, patut nepak kulkul bulus mapitulung manut pawos 15 (2) aksara na.
- (3) Prade ring desa kahanan jiwa bhaya, patut desane ngaturang bhuta yadnya tur sang mayanin katur ring sang ngawiwenang.
- (4) Prade wenten jatma mamisuh utawi nguman-uman jatma sios, kakenin pamidanda beya pacamil tebasan prayascita.

Pawos 54

- (1) Sang manggihin kahanan artha bhaya (kamalingan), patut ngulkul mapitulung manut ring pawos 15 (2) aksara na, utawi sang kamalingan atur supeksa ring

- prajuru, dulu desa sane pacang nandanin saha mawuwuh panyangaskara prade wenten jatma ngamaling barang sinanggeh suci.
- (2) Pratingkah mapailon ring dusta kabawos saruron, utawi prade wenten jatma manggihin maling tan nyadokang ring prajuru jantos jatma sios nyaduang, patut jantos ping tiga malaksana asapunika wenang kasukserah ring sang ngawiwenang.
 - (3) Prade wenten jatma ngrereh reramon, minakadi daun kelapa, ron, tan pasadok ring sang nruwenang, prade kacunduk (ketara) patut kadanda kadi dandaning maling.
 - (4) Yening wenten jatma ngranjing pakubon wiadin pakarangan rikala suwung, mawastu sang madruwe karang kaicalan, wenang jatma inucap katuwekang antuk madewa saksi ring Pura Bale Agung.
 - (5) Mangda tan katuwekang manut ring ajeng, asing-asing ngranjing kubon jatma sios patut :
 - ha. Matengeran suara (makaukan);
 - na. Nyantos sang nruwenang karang rawuh utawi masadok ring pangapit pinih tampek, maka buatan pangranjinge;
 - ca. Pamedal karangnia kasawenin, maka cihna pangarah rikala suwung.

Palet 2
Indik Karang lan Tegal
Pawos 55

- (1) Krama desa pangemong karang ayahan desa (tanah sane tan keni tigasana) patut ngawastanin karang inucap antuk pagehan/turus utawi tembok mangda pakantenannia asri.
- (2) Wates sisi kaler miwah kangin patut kakaryanin antuk sang ngainong karang ayahan inucap, sane mawasta gagaleng ka luan, sajawaning tanah pecatu, tegal, carik utawi tanah padruweyan ngeraga, sane kapiara watese sisi kelod miwah kauh, reh punika mawasta gagaleng kateben.
- (3) Prade karasayang pagehan/turus inucap nglikadin, yan pada arsa panyandinge, kengin watese ngangge pinget kewanten kasaksinin antuk prajuru desa utawi pracihna pal saking Agraria.
- (4) Prade wenten karang kabebeng patut kautsahayang wenten margi.

Pawos 56

- (1) Sinalih tunggil krama desa/banjar tan kalugra :
 - ha. Ngalah-alah margi, tegal ayahan desa, karang desa;
 - na. Ngalah-alah tanah tegak kahyangan, lan setra, sekancan tegak sinanggeh suci
- (2) Prade wenten sakadi ring ajeng, sang ngalah-alah patut ngawaliang tanah inucap saha pamidanda sapatutnya kadulurin upakara ring genah suci sane kalah-alah.

Palet 3
Indik Pepayonan
Pawos 57

- (1) Ngawit nandur pepayonan, tanem tuwuh adepa agung ngajeroang saking wates, prade jantos ngliwat wates wenang kasepat gantungin.
- (2) Yening pepayonan ngungkulin, samaliha mawastu mayanin ka pisaga patut kawara antuk paiguman ping ajeng prasida sang nruwenang wit ngrabah utawi notor.
- (3) Prade sampun kawara taler tan wenten usaha sang nruwenang wit, sang rumasa katetehan/kajerihan wenang masadok ring prajuru, tur risampun kaparitas kalugra ngicalang wit inucap.
- (4) Sang keni pamidanda panyangaskara saha prabeya manut pararem arep ring wewangunan sang karubuhan, luwire :
ha. Sang nruwenang wit sinanggeh mayanin, prade pungkut ngrubuhin wewangunan krama sios;
na. Sang notor, munggul utawi ngrebah taru tur ngrubuhin wewangunan krama sios.
- (5) Krama desa patut ngamanggehang kawerdian tanem tuwuh sane ngawinan desane asri tur lestari.

Palet 4
Indik Wewalungan
Pawos 58

- (1) Sahanan warga desa sane mamiara wewalungan (bawi, risampun mabelas utawi banteng lan selantur ipun sampun masaluk tali), patut sayaga nitenin negul/nglogor mangda tan ngrusakin karang utawi pabianan krama sios, bilih-bilih jantos ngranjing ngeletehin kahyangan.
- (2) Prade wenten wewalungan malumbar utawi ngeleb ngrusakin karang/pabianan krama sios, risampun kawara kengin kataban tur kadanda ngewaliang wit sane karusak saha naur panebas papiaran tetabanan manut penglokikan prajuru desa.
- (3) Prade jantos ngletehin tegak suci minakadi pamerajan (sangguh kamulan), risampun kaparitas antuk prajuru wenang sang nruwenang kadanda mabuhu agung tebasan prayascita, durmanggala utawi Panca sata, iwak bebek belangkalung, prade jantos ngletehin Kahyangan Desa utawi Pura Pamaksan.
- (4) Krama desa patut nyerayanin wewalungan miwah sarwa prani, tan kapatutang maboros paksi miwah nuba ulam lan siosan punika.

Palet 5
Indik Wewangunan
Pawos 59

- (1) Nyabran ngwangun patut :
ha. Masadok ring prajuru, ping ajeng prade wenten wewangunan nganinin wates
na. Ngangge Asta Bhumi miwah gagulak Asta Kosala-kosali, sanistane manut patitis niskala;
ca. Tan nyayubin ka pisaga.

- (2) Prade wewangunan jantos nyayubin bilih-bilih temboke ring telenging wates risampun kawara tur kasadokang ring prajuru, wenang kadanda manut pararem, saha tembok inucap kagubar utawi sanistane mangda kakaryanang abangan.

**SAPTAMAS SARGHAH
WICARA LAN PAMIDANDA**

**Palet 1
Indik Wicara
Pawos 60**

- (1) Sane wenang mawosin makadi mutusang wicara ring desa inggih punika Prajuru Desa sinanggeh kerta desa :
ha. I Kelian Banjar, pradene sang mawicara sane panunggilan banjar;
na. Bendesa prade sang mawicara sami-sami ring patunggalan Desa Pakraman.
- (2) Tata dudonan mawosin saha muputang wicara warga desa kadi ring sor :
ha. Kaping ajeng kabawosin antuk Kelian Banjar;
na. Tan cumpu ring pancpas Kelian Banjar katunasang ring panglingsir banjar;
ca. Paruman banjar tan keanutin kengin nunasang ring Bendesa;
ra. Bendesa tan prasida muputang katincapang ring panglingsir sinanggeh kerta desa;
ka. Prade taler pamatut panglingsir desa tan kacumponin katunasang ring paruman desa, sinanggeh wasananing pamutus ring desa.
- (3) Prade sang mawicara tan wenten cumpu ring pamutus kerta desa, kengin nunasang wicara inucap ring sang rumawos (Pengadilan Negeri)

Pawos 61

- (1) Sahanan wicara mawiwit kacorahan sakaluwire sinanggeh nungkasing daging Awig-awig, paswaran miwah pararem Desa utawi Banjar, Prajuru utawi Dulu Desa patut digelis mawosin tan nyantos pasadok.
- (2) Sajaba wicara kadi ajeng patut nyantosang pasadok sang nunas bawos.
- (3) Panepase patut pastika nyantenang iwang patut malarapan Tri Premana (saksi, lekita, bukti) miwah tan maren nepek ring catur dresta.

**Palet 2
Indik Pamidanda
Pawos 62**

- (1) Desa utawi Banjar wenang niwakang pamidanda ring warga desa utawi banjar sane sisip.
- (2) Paniwak inucap kamargiang olih Bendesa utawi Kelian Banjar.
- (3) Bacakan pamidanda, luwire :
ha. Ayahan panukun kasisipan;
na. Danda artha (dosa, danda, saha panikel paturunan);
ca. Rarampagan;
ra. Kadaut karang ayahannya, utawi kasepekan;

- ka. Panyangaskara;
da. Kawaliang pipil nyane (kawusang makrama).
- (4) Pamidanda sane katiwakang patut masor singgih manut ring kasisipane.
 - (5) Jinah utawi raja brana pamidanda ngeranjing dados druwe Desa utawi Banjar.

Pawos 63

- (1) Krama sane langkung ring tigang paruman ngelantur tan nawur urunan miwah dadendan wenang karampag;
- (2) Rarampagan ngangge tata cara kadi ring sor :
 - ha. Kalaksanayang antuk kasarengin antuk Krama Desane seakeh tigang diri maka saksi;
 - na. Sang ngarampag saking darsana ngambil barang utawi nyawenin tanem tuwuh, akehnya manut ring hutang sang karampag;
 - ca. Prajuru mapiteketang mangda barang-barang sane karampag digelis katebus, masenger awuku ring rahina pacang kaadol;
 - ra. Tan nganinin saluwir barang sane patut inggilang manut agama miwah mademang pangupa jiwa sang karampag.

Pawos 64

- (1) Prade sang pacang karampag ngewara (ngalangin) pamargin inucap mawastu sampun tan nganutin awig-awig desa wenang karang desa sane kagenahin kadaut antuk desane utawi kasepekan.
- (2) Samalih yan purun taler ngalangin paridabdab kadi ring ajeng tan wenten pamargi sawanang kawaliang pipil nyane (kawusang makrama).
- (3) Pamidanda inucap ring ajeng keni buntas risampun sang kakeninin :
 - ha. Nunas geng pangampura ring krama desa riantukan nguak pasubaya (pararem) pecak;
 - na. Nawur pangangan panguwak pasubaya duk pacang karampag kadulurin prayascita.

ASTAMA SARGAH NGUWAH-NGUWUHIN AWIG-AWIG

Pawos 65

- (1) Nguwah-nguwuhin Awig-awig Desa puniki kamargiang antuk paruman Desa.
- (2) Paruman inucap mangda kadasarin antuk pakarsan Krama Desa Adat yadiastun kamedalang antuk Prajuru sinunggil wiadin sinarengan.
- (3) Awig-awig puniki kamargiang ngawit kaingkupin (kararemin).

**NAVAMAS SARGAH
SAMAPTA
Pawos 66**

- (1) Awig-awig puniki kawastanin awig-awig Desa Pakraman Penglumbaran Kangin
- (2) Awig-awig puniki kamargiang ngawit kasungkemin ring paruman.

Pawos 67

- (1) Sakaluwir sane wenten saderengnya patut kaanutang ring sadaging awig-awig puniki.
- (2) Sakaluwir sane durung kabawos sajeroning awig-awig puniki patut kamargiang manut tata cara sane sampun katah mamargi kadulurin antuk pararem.

Pawos 68

- (1) Awig-awig puniki kasungkemin ring paruman duk rahina Soma Kliwon wuku Landep pinanggal/pang 13 (telulas) Sasih Sada Içaka Warsa 1930 tanggal 16 Juni masehi 2008 Ring Bale Pasamuan Pura Puseh Asti Gebog Satak Tiga Buungan
- (2) Awig-awig puniki kalinggatanganin antuk Bendesa, kasarengin Kelian Banjar saha kasaksiang antuk Kelian Banjar Dinas miwah Perbekel sawidangan Desa Dinas Tiga saha kapikukuh antuk Bupati Bangli.
- (3) Luwir sang ngalingga tanganin :

ha Kapertama Prajuru utawi Dulun Desa :
Bendesa Penglumbaran Kangin,.




I Ketut Jeljel

- 2) Kelian Banjar Penglumbaran Kangin,

I Wayan Lompeh

na. Kaping kalih Prajuru/Desa Dinas maka saksi :




I Wayan Sutapa



2) Perbekel Desa Tiga,

I Kadek Budiartawan

3) Camat Susut,



Drs. A.A. Gde Alit Darmawan, MM.

ca. Bupati Bangli maka murdha pamikukuh

Mengetahui dan telah dicatatkan :

Tanggal

: 16 - 6 - 2008

Reg. Nomor

: 03 TH 2008



Bupati Bangli

I Nengah Arnawa, S.Sos., MM.